

CONVENIO DE COLABORACIÓN ENTRE A CONSELLERÍA DE CULTURA, EDUCACIÓN E ORDENACIÓN UNIVERSITARIA DA XUNTA DE GALICIA E O CONCELLO DE VIGO, PARA AMPLIACIÓN DO CEIP ALFONSO RODRÍGUEZ CASTELAO.

En Santiago de Compostela, a 29 de xullo de 2016

REUNIDOS

DUNHA PARTE o Sr. conselleiro de Cultura, Educación e Ordenación Universitaria da Xunta de Galicia, D. _____, que actúa en virtude das facultades atribuídas no artigo 34 da Lei 1/1983, do 22 de febreiro, reguladora da Xunta e da súa Presidencia e na Lei 16/2010, do 17 de decembro, de organización e funcionamento da Administración xeral e do sector público autonómico de Galicia e de acordo co seu nomeamento polo Decreto 15/2015, do 9 de febreiro e no uso das atribucións que lle confire o Decreto 4/2013, do 10 de xaneiro, polo que se establece a estrutura orgánica da Consellería de Cultura, Educación e Ordenación Universitaria.

DOUTRA PARTE o Sr. Alcalde-Presidente do Concello de Vigo, _____, designado na sesión do Pleno da Corporación do día 13 de xuño de 2015, e que actúa en representación do concello de acordo cos artigos 21.1 b) da Lei 7/1985, do 2 de abril, de bases de réxime local 7/85 (en diante LBRL) e o artigo 61.1 a) da Lei 5/1997, do 22 de xullo, de administración local de Galicia (en diante LALGA).

Ambas as partes recoñécense mutuamente capacidade legal suficiente para subscribir o presente convenio de colaboración, e a tal efecto

EXPOÑEN

Primeiro.- Que as Administracións das Comunidades Autónomas poden celebrar convenios de colaboración coas Corporacións Locais ou con outros entes de dereito público e con persoas físicas ou xurídicas suxeitas ao dereito privado, ao abeiro do

disposto no artigo 6 da Lei 30/1992, do 26 de novembro, de réxime xurídico das administracións públicas e do procedemento administrativo común (LRXPAC).

Segundo.- Que segundo o artigo 193 da Lei 5/1997, do 22 de xullo de Administración Local de Galicia (LALGA), as entidades locais galegas e a Xunta de Galicia adecuarán a súa actuación aos principios de colaboración, cooperación e auxilio que puidesen precisar coxunturalmente para o eficaz cumprimento das súas tarefas.

A colaboración entenderase como o deber de todas as Administracións Públicas de ponderar e respectar, nas súas respectivas actuacións, a totalidade dos intereses públicos implicados, así como, no traballo en común para a solución daqueles problemas que puidesen exporse máis alá do concreto reparto competencial.

Terceiro.- O artigo 25.2 m) e n) da Lei 7/1985, do 2 de abril, reguladora das bases do réxime local (LBRL), modificada pola Lei 27/2013, do 27 de decembro, de racionalización e sustentabilidade da Administración local (LRSAL), establece que o municipio exercerá, en todo caso, como competencias propias, nos termos da lexislación do Estado e da Comunidade Autónoma, entre outras, “a promoción da cultura e equipamentos culturais”, así como de “participar na vixilancia do cumprimento da escolaridade obrigatoria e cooperar coas Administracións educativas correspondentes na obtención dos soares necesarios para a construción de novos centros docentes. A conservación, mantemento e vixilancia dos edificios de titularidade local destinados a centros públicos de educación infantil, de educación primaria ou de educación especial”. Estas competencias asúmense pola Comunidade Autónoma de Galicia, respecto dos municipios do seu ámbito territorial, en virtude das letras n) e ñ) do artigo 80.2 da LALGA.

As disposicións adicionais primeira e cuarta da Lei 5/2014, do 27 de maio, de medidas urxentes derivadas da entrada en vigor da LRSAL, dispoñen que as competencias atribuídas ás entidades locais pola lexislación autonómica anterior á entrada en vigor da LRSAL continuarán exercéndoas elas, rexéndose pola indicada lexislación ou, no seu caso, polo dereito estatal aplicable como supletorio, sen prexuízo do disposto nas disposicións adicionais cuarta e quinta da LRSAL. As competencias que debe asumir a Administración

da Comunidade Autónoma de Galicia en materia de educación, saúde e servizos sociais en cumprimento das disposicións da LRSAL, continuarán prestándose polos municipios en tanto non se dean as condicións previstas para o seu traspaso na normativa básica e, en particular, o establecemento do novo sistema de financiamento autonómico e das facendas locais previsto na mesma.

Así mesmo, a disposición adicional décimo quinta, apartado 4, da Lei Orgánica 2/2006, do 3 de maio, de educación, determina que os municipios cooperarán coas Administracións educativas correspondentes na obtención dos solares necesarios para a adaptación ou construción dos centros docentes.

Cuarto.- Que a Consellería de Cultura, Educación e Ordenación Universitaria, en harmonía co artigo 31 do Estatuto de autonomía de Galicia, ten as atribucións que veñen reflectidas no artigo 1 do Decreto 4/2013, do 10 de xaneiro, polo que se establece a estrutura orgánica da Consellería de Cultura, Educación e Ordenación Universitaria en materia de planificación, regulación e administración do ensino regrado en toda a súa extensión, niveis e graos, modalidades e especialidades.

Quinto.- Que co fin de materializar a cooperación para potenciar o desenvolvemento do sistema educativo galego, en especial no que atinxe á comunidade escolar da entidade local, a Xunta de Galicia, a través da Consellería de Cultura, Educación e Ordenación Universitaria, e o Concello de Vigo acordan subscribir o presente convenio de colaboración para a ampliación do CEIP Alfonso Rodríguez Castelao.

Sexto.- Conscientes da antedita necesidade as partes intervenientes acordan unir os seus esforzos para acadar o obxectivo sinalado. Por iso, e a fin de levar adiante o proxecto no Concello de Vigo, é necesaria a concorrencia de medios e achegas de ambas as dúas partes interesadas, polo que é preciso determinalo contido da mencionada colaboración.

Así, e co fin de acadar o obxectivo exposto, ambas as partes, de común acordo, conforme ao artigo 57 da LBRL, declaran a súa vontade de subscribir o presente convenio, de acordo coas seguintes

CLÁUSULAS

Primeira.- Obxecto do Convenio.- Constitúe o obxecto do presente convenio o establecemento dos mecanismos de colaboración necesarios entre a Xunta de Galicia, a través da Consellería de Cultura, Educación e Ordenación Universitaria e o Concello de Vigo para a ampliación do CEIP Alfonso Rodríguez Castelao, de acordo co establecido na cláusula segunda do presente convenio.

Segunda.- Compromisos e achegas.-

Polo Concello de Vigo.-

- O Concello como propietario dun solar nomeado PARCELA R RESULTANTE DA AGRUPACIÓN PARCELA E4-1 e FINCA SEGREGADA E4-3.1, e coas seguintes características: Situación: Rúa das Ufas s/n – Navia; Ref. Catastral: 9831424NG1793S0001BR, superficie 8.000 m², e cos seguintes lindeiros: NORTE: Concello de Vigo (parcela da Escola Infantil) e Xunta de Galicia (CEIP R. Castelao): Líña quebrada de 38.70 ml; 14.95 ml; 21 ml; 1.80 ml e 27.80 ml; SUR: Resto da finca matriz: Concello de Vigo. Líña de 97,55 ml; LESTE: Xunta de Galicia (CEIP R. Castelao , Escola Superior de Arte Dramático) Líña quebrada de 26.30 ml; 10.95 ml e 50.15 ml; OESTE: Rúa das Ufas: Líña de 104.22 ml; porá a disposición da Consellería de Cultura, Educación e Ordenación Universitaria o solar descrito anteriormente para a ampliación do CEIP Alfonso Rodríguez Castelao.
- O prazo para inicio das obras non poderá superar os 36 meses. Transcorridos 36 meses dende a sinatura do convenio, se non comezaran as obras, a posta a disposición dos terreos quedará sen efecto.
- Unha vez edificado o centro escolar, a posta a disposición dos terreos estará en vigor en tanto os edificios estean afectos ao uso educativo. No suposto de desafectación ao uso educativo, os terreos e todas as construcións sobre eles

situadas retornarán ao Concello de Vigo.

- Esta posta a disposición será libre de cargas e gravames e sen reserva ningunha.
- A posta en disposición da parcela non supón renuncia nin cesión de dereitos polo Concello de Vigo, que ostentará as usas facultades e prerrogativas legais como propietario da mesma
- O Concello de Vigo achegará á Consellería a documentación que se relaciona no ANEXO I deste convenio de colaboración.
- Será responsabilidade do Concello de Vigo garantir que os terreos onde se pretende a execución da obra estean dotados, ao pé da parcela, dos usos urbanísticos e das infraestruturas adecuadas para o servizo educativo (abastecemento de auga, subministración eléctrica, saneamento e rede de sumidoiro)
- A entidade local, comprométese a aprobación do proxecto comprobando que o mesmo cumpre todos os requisitos técnicos e administrativos para a súa aprobación.
- A construción gozará dun 95% na cota do Imposto de construcións, instalacións e obras de seren declaradas de “especial interese ou utilidade municipal” por seren realizadas pola Consellería de Educación e Ordenación Universitaria para establecementos educativos que figuren no Inventario de Bens e Dereitos do Concello de Vigo, segundo apartado 3 e seguintes do artigo 3 da Ordenanza municipal do exercicio 2016 reguladora do tributo
- O mantemento e conservación do centro corresponderán ao Concello. Para tal fin, unha vez rematadas as obras, e con carácter previo á súa recepción, a Consellería recabará a aprobación do informe final de obra, sen prexuízo da necesaria ulterior formalización da correspondente acta de entrega.
- Unha vez formalizada a acta de entrega, o Concello asumirá a obriga de conservación e mantemento das instalacións destinadas a un uso educativo.

Pola Consellería de Cultura, Educación e Ordenación Universitaria.-

- Realizados polo Concello os trámites sinalados anteriormente e logo do informe favorable dos técnicos da Consellería de Cultura, Educación e Ordenación Universitaria sobre a idoneidade dos terreos obxecto da posta a disposición, a Consellería elaborará, no seu caso, supervisará e aprobará o proxecto básico e de execución para a obra de ampliación do CEIP.
- Unha vez formalizada a posta a disposición e supervisado o proxecto básico e de execución, a Consellería de Cultura, Educación e Ordenación Universitaria iniciará a tramitación da contracción do gasto con cargo aos seus orzamentos, así como a tramitación dos correspondentes expedientes de licitación, dirección e execución das obras de ampliación do CEIP, supeditándose o inicio da execución das obras á concesión da correspondente licenza de obra.

Terceira.- Mecanismos de seguimento.- A fin de realizar o seguimento e a avaliación do grao de execución do convenio, así como a interpretación e cumprimento do convenio, ambas as partes conveñen a constitución dunha Comisión mixta paritaria, composta por dous representantes de cada unha das partes signatarias.

A Comisión de Seguimento reunirse sempre que o solicite algunha das partes, así como no caso en que xurda algún tipo de controversia durante a súa execución.

Cuarta.- Vixencia e Resolución.- O presente convenio entrará en vigor na data da súa sinatura e estará vixente ata o momento en que rematen as actuacións previstas na cláusula segunda.

Ademais da expiración do seu prazo de vixencia, serán causas de extinción da autorización e do convenio o mutuo acordo das partes asinantes ou a decisión unilateral dunha parte por incumprimento da outra parte ou porque existen causas excepcionais e xustificadas que dificulten ou obstaculicen o cumprimento das estipulacións que constitúen o seu contido, previa denuncia cun prazo de dous meses de antelación.

Quinta.-. *Natureza e xurisdición.-* Este convenio ten natureza administrativa, sendo o réxime xurídico aplicable ao mesmo o establecido no Título I da LRXPAC.

Calquera cuestión que se suscite en canto á aplicación, interpretación e efectos do convenio, que non queden solventadas pola Comisión mixta de seguimento prevista na cláusula terceira serán resoltas polos órganos da xurisdición contencioso-administrativa.

E en proba de conformidade, asinan o presente convenio por duplicado no lugar e data indicados, quedando un exemplar en poder de cada unha das partes asinantes.

POLA XUNTA DE GALICIA

**A Consellería de Cultura, Educación e
Ordenación Universitaria**

POLO CONCELLO DE VIGO

O Alcalde-Presidente,

ANEXO I

AO CONVENIO DE COLABORACIÓN ENTRE A CONSELLERÍA DE CULTURA, EDUCACIÓN E ORDENACIÓN UNIVERSITARIA DA XUNTA DE GALICIA E O CONCELLO DE VIGO, PARA A AMPLIACIÓN DO CEIP ALFONSO RODRÍGUEZ CASTELAO.

Documentación a achegar polo Concello para o expediente de posta a disposición da parcela:

1.- Certificación do acordo do órgano con competencias na posta a disposición dos terreos que debe conter os extremos seguintes:

- a) Posta a disposición, libre de cargas e gravames, sen reserva ningunha, do solar descrito na cláusula primeira deste convenio, cos usos urbanísticos e infraestruturas (abastecemento de auga, subministro eléctrico e saneamento) que se relacionan no Anexo II deste convenio, así como os correspondentes permisos, licencias e autorizacións necesarios, incluída a de levar a cabo os estudos xeotécnicos.
- b) A asunción das obrigas económicas que, se é o caso, se deriven do convenio.
- c) A obriga de asumir, unha vez recibidas as obras e logo da comunicación da consellería, a explotación, mantemento e conservación das instalacións do centro educativo.

2.- O concello deberá achegar ademais a seguinte documentación:

-Certificación da persoa titular da Secretaría da corporación, na que se faga constar que a parcela que se pon a disposición, figura no inventario de bens da dita corporación.

